

Perdana Menteri umum dua program penanda aras untuk usahawan sosial
Astro Awani
Dec 8, 2016
Rahimah Abdullah

KUALA LUMPUR: Perdana Menteri, Datuk Seri Najib Tun Razak mengumumkan dua program penanda aras bagi meningkatkan pengiktirafan sektor keusahawanan sosial baharu di negara ini.

Ia melibatkan program pensijilan keusahawanan sosial dan insentif pemerolehan sosial.

"Inisiatif ini akan memberi pengiktirafan kepada sektor keusahawanan sosial baharu di Malaysia dan ia akan memberikan faedah, insentif, dan penghormatan usahawan sosial," katanya semasa berucap merasmikan Komuniti Keusahawanan Global dan Tahun Pengkomersialan Malaysia 2016 (MCY 2016) di Pusat Konvensyen Kuala Lumpur di sini hari ini.

Pada majlis itu, Perdana Menteri turut menyampaikan enam anugerah utama Anugerah MCY 2016 dengan hadiah keseluruhan berjumlah RM1 juta.

Ujarnya, program berkenaan adalah selaras dengan sasaran mencapai 1,000 usahawan sosial baharu menjelang 2018.

"Program pensijilan ini akan memanfaatkan sekurang-kurangnya 500,000 individu B40 melalui keusahawanan sosial terlibat. Ia akan diperkenalkan oleh MaGIC bermula Jun 2017," tambahnya lagi.

Dalam pada itu, Perdana Menteri turut mengumumkan gelombang kedua Tahun Pengkomersialan bagi tahun 2017.

Ia merangkumi dua inisiatif kerajaan iaitu Program Pemacu Global dan Impak Cabaran ASEAN yang akan dilaksanakan melalui MaGIC.

"Inisiatif ini akan memberi sokongan antara satu sama lain dalam melahirkan usahawan yang berjaya dalam pelbagai sektor dan komuniti," kata beliau.

Menurutnya lagi, semua inisiatif berkenaan akan meningkatkan lebih banyak peluang baharu dalam perniagaan, dan menjadi pemangkin pertumbuhan keusahawanan.

Tag: [Najib Razak](#), [sektor keusahawanan sosial](#), [pensijilan](#), [pemerolehan](#), [anugerah MCY](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/perdana-menteri-umum-dua-program-penanda-aras-untuk-usahawan-sosial-125012>